

Oqaluuserisassanut nassuiaat.

(Inatsisartut Siulittaasuut)

Inuussutissarsiornermut Aatsitassanullu Ataatsimiititaliaq oqaluuserisassani immikkoortup 61-ip aappassaaneerneqarnissaata maajip ulluisa 30-annut kinguartinneqarnissaanik qinnuteqarpoq.

Immikkoortup 61-ip qulequtaraa:

Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiorluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput.

Ilaqutariinnermut Peqqissutsimullu Ataatsimiititaliaq oqaluuserisassani immikkoortup 103-p aappassaaneerneqarnissaata kinguartinneqarnissaanik qinnuteqarpoq.

Immikkoortup 103-p qulequtaraa:

Kommuunit oqaloqateqatigalugit inuit napparsimanermik pissuteqartumik suliffissarsiortut ikiorsiissutinik qinnuteqartut qanoq pitsaanerpaamik aalajangiinissap tungaanut aningaasartuutiminnik akissaqarnissaannut sullinneqarnissaannik qulakkeerinninnissamut Naalakkersuisut peqquneqarnissaannik Inatsisartut aalajangiiffisissaattut siunnersuut.

Nunanut Allanut Sillimaniarnermullu Ataatsimiititaliaq oqaluuserisassani immikkoortup 57-ip UKA2023-mut kinguartinneqarnissaanik qinnuteqarpoq.

Immikkoortup 57-ip qulequtaraa:

Kunngearfiup Danmarkip Naalakkersuisut peqatigalugit Canadap naalakkersuisuinik ulloq 14. juni 2022-imi Kalaallit Nunaata Canadallu

akornanni imaani killeqarfimmik nunamilu killeqarfimmik Kalaallit Nunaata isumaqatigiissuteqarnerata atuutsilersinnissaa pillugu Inatsisartut aalajangiiffigisassaattut siunnersuut.

Ataatsimiititaliaq pineqartoq taamatuttaaq oqaluuserisassani immikkoortup 58-ip aappassaaneerseqarnissaata maajip ulluisa 31-annut kinguartinneqarnissaanik qinnuteqarpoq.

Immikkoortup 58-ip qulequtaraa:

Uunga siunnersuut: Kalaallit Nunaata nunasiaataanerani ingerlatsinermut pissutsit pillugit qulaajaasoqarnissaanut, tamatumunngalu atatillugu Danmarkip NP nunasiaataajunnaarsitsinermut piumasaqaataanik naammassinnissimanersoq suliassamik allaaserinnittoqarnissaanik Inatsisartunit akuersissutigineqartussatut aalajangiiffigisassaattut siunnersuut.

Eqqissimatitsinermut Avatangiisinullu Ataatsimiititaliaq oqaluuserisassani immikkoortup 60-ip ataatsimiinnermi kingusinnerusumut kinguartinneqarnissaanik qinnuteqarpoq:

Immikkoortup 60-ip qulequtaraa:

Paris-imi isumaqatigiissummut Kalaallit Nunaata nunamut nangaassuteqarnera atorunnaarsinneqassasoq aammalu Naalagaaffiit Peqatigiit Silap pissusia pillugu nunani tamalaani isumaqatigiissutaannut, UNFCCC-imut, nalunaarutigineqassasoq, danskit naalakkersuisuinut nalunaarutigeqqullugu Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

Taasisarnerit pillugit uku akornanni isumaqatigiissuteqartoqarpoq:

Harald Bianco, Inuit Ataqatigiit aamma Siverth K. Heilmann, Atassut.